

葉昌熾
著

緣
督
廬
日
記



清·葉昌熾 著



廬日記

一〇

江蘇古籍出版社

樣本書



淮陰師院圖書館 543246

戊申日記

九月

初九日晴陰重陽佳節思親養疴料理案頭積牘未嘗闕戶遑言登高劉姬服昨藥二煎胃納漸開頗思食矣晚餐後即身熱熱度漸移而早如能減輕縮短則即可占勿藥矣不佞亦以病後不復原精氣耗散神不守舍語過輒忘心脾腎三臟皆虧自定一消補兼施之劑參耆苓朮枸杞杜仲益智熟地砂仁香附陳皮雞金共十二味分晝夜服兩煎閱存古卷訖沈綏成先已月旦閱點塗乙淋漓滿紙不再加墨每卷僅加一摠批閱有識語加簽而已最優等三卷楊定輔曹學曾趙

樹棠優等六卷前三名焦啓愚畢人夔周品高平等五卷謝承焜一卷荒率不成文勉附平等之末核計分數自三十起八十為極並無定估曹陳諸君有^其舉之莫敢廢也星台函來以姪人病店勸服金雞納霜又附到仲午一緘以賤庚六月初度錫嘉慶雕壺壽字銅爐為祝惇獨殘年妻妾並聾兒女皆逝塊然一身聞人稱壽徒增長慟何敢當何敢當夜雨初十日陰雨遣陸升上城餽外孫有果以墳糧草粟赴縣櫃換版串帶去叔彥綏成兩函課卷十五本又仲侯一函詠招招之詩鍵戶養疴已兩月同室皆病拂鬱滋甚非出游無以陶寫矣附去星台一函以仲午壺爐返璧解卿一函申言前函

所未盡校邠師百齡冥誕寶積寺諷經送酒燭券各一千衫
致頌青函為劉姬乞金雞納霜復書言熱未至前二鐘服三
四釐味苦以龍眼肉裹服三服無不愈者昨宵以參附力猛
又筆墨糾紛伏案稍久夜不能寐今日僅力疾校語石卷八
八葉即昏然思睡倚枕閱瀛寰全志自遣亦未畢非洲一卷
仲侯自航來一緘又得旭初函問姬人病

十一日陰雨午前亦園來銅井午後來其意皆在祝壽聞鄙人
所言徑庭皆愀然而去劉姬昨黃昏又身熱今日午後尚未
退涼康吉函來以白虎湯之說進此症早欲用石膏醫家視
之為劫劑期期以為不可陳杏孫來診仍言陽明邪熱留戀

表病雖罷裏病未除未可遽求速效邪陷無慮柴葛可以不
用尚當以輕劑解表以豆豉桑丹主治佐以連翹山梔花粉
蘆蒿半夏與貝母同打艸果與知母同打澤蘭石斛共十四
味服一劑服後即得寐熱解沈方渠夫人以函致劉姬問疾
並餽有點

十二日陰日將斜澹澹穿牖康吉將赴如皋嫁女以一函往送
別正在午餐誦範遺專足自城來賫到都門父兄兩函餽緼
幃一佩公葵初楹聯各一祝敬四元不勝駭汗不佞處人生
之極艱畏人稱壽亦不敢以不祥之身附稱觴之列是公佩
公今夏六十慶辰未嘗以芹曝先施今乃不遺在遠飾嫺母

以鉛華媿何如矣聯有款不敢卻犒以一元並先致誦範一
緘剴切告之又得仲侯函雇定常熟船一艘首尾六日洋八
元二角明晨到瀆又餽肴點多品星台暮來帶至語石修補
樣十五開仲午已先校一過即閱訖劉姬服昨藥二煎旁晚
以金雞那霜三釐與之如法以桂圓裹服病踰半月漸形委
頓夜咳嗆不絕惡聞人聲正在壯年北產強健而正氣猶苦
不支無怪老夫之憊已

十三日陰雨復仲侯一函又寄仲午書修補樣十五開新校樣
卷八八開又草就旭初一函因劉姬昨半夜形凜大作如墜
冰窖一被一毯尚敲棘又加一厚被始定此症多^熱多寒少寒

至戰栗齒擊弟一次也與函所述病情不同未付航遣人往
問陳杏孫云熱病在裏寒病在表此由內達外之象非惡徵
也大約金雞那之效然不可再服鄙人昨臨臥覺喉間痒痒
然有異手觸微痛夢回氣促今旦家人環視云喉骨高腫然
飲食下咽尚無苦語言呼吸則微有扞格病當在表而不在
裏其地為弟一要津不敢不戒嚴仲侯所雇舟近午來船戶
持一函登岸云先已付定洋三元並帶至新修表一隻飯後
偕星名惘惘登舟下船大雨如注抵莫至棗市橋泊馬路洋
橋之東此次出游病餘腰腳既無濟勝之具妾病尚呻吟在
榻雖與老妻丁寧言別心旌不定夜臥煩燥似寐非寐

十四日陰晴早晚皆有一陣雨晨起視喉骨腫勢無增損呼吸依然氣短移舟泊閭門外太子碼頭別雇一小舟進城抵桃花橋泊登岸訪叔彥求診於智涵鄭重而出敬聽其自言病而後始敢以病告據云脈尺弱而右大喉閉係感風熱而起仍為標症先其所急當治標而不礙本問何症云成則為鎖喉癰不治今尚萌芽一二劑即可消散桑葉牛蒡土貝蒺藜杏仁竹葉絲瓜橘絡海浮石海蛤壳枇杷葉共十一味又問叔彥可亭罪案則以專欲難成告今代之者即為智涵之子黼侯曾學法政畢業者也又言扞鄭已決計不來欲聘褚伯雅或詠春霄緯中擇一人略談仍以船過船時已踰午治餐

後即放棹過齊女門行十里至陸墓鎮宿與星台登岸意行約半里南北街長有二三里煙戶亦稠密然貿易遠不如瀆上之餘盛以甌瓦窑為多星台代作家言交閭門航送瀆又為劉姬謝其舊主一函交郵館

十五日陰平明開船六里過蠡口僕人登岸買魚蔬據云邨店無多家午刻過洪塔自蘇至常路得半再北為張家澱再北為白窑距海虞僅九里矣五鐘過永濟橋至南門泊距翼京門僅數武與星台進城行半里衢市尚整潔見蕉黃可愛市兩枚以返喉閒呼吸稍舒而腫不退昨宵轉側更鼓紆如不能寐平臥覺顫痛坐起則稍愈便秘已四日兩眼腫痛如揉

沙石智涵云有浮熱中冑之言也昨方已從沐泰山贖一劑
午後煎服香蕉性大寒清大腸火視生軍僅下一等向不敢
服亦服少許今日為我生初度之辰六十平頭童年羸弱始
願所不及此修名不立門祚餒而無以見先人於地下此則
撫心滋疚者耳

十六日竟日雨初如灰繼如絲既而蓬窗點滴聲聲入耳風定
無波雲堆如絮知天之靳我以遊也惟有搔首長歎晨起腑
行甚暢喉閒呼吸亦稍舒香蕉之驗也午前遣奴子至大榆
樹頭角裡訪王翰臣以枸杞桂耳各一匣棗餅二十龍井兩
瓶為贄並奠敬兩元賻其夫人之喪則父子皆出游矣不得

己又往蹤跡張仲履先至老塔後故宅己遷居辛家街即在
南門內半里俄以肩輿來即冒雨進城至其寓不見己踰二
十年年四十六矣老母尚在堂亦無子僅有一胞弟奉母居
鄉出其先人純卿先生知退齋文集見贈並徵序共七卷補
遺一冊咸豐辛酉安慶乞師迎師日記一冊告以遊山求先
導並屬相宅本山桂花栗新上市出以餉客香輦適口不覺
過飽歸舟即減餐夜雨聲到枕如沸如羹耳根砢鈍心坎鞢
鞢自宵達旦無片刻停此游也雖使詹尹拂著史墨灼龜諏
吉首塗亦難得此佳日鄙人誠天幸秋稼登場矣悠悠蒼天
謂之何哉

十七日陰雨游興索然日加已始起推蓬視雲氣濃厚密雨猶如散絲也先以一函約張仲履同往相宅而仲履午後造舟言相宅非一處必先函約其居停請遲一日告以天霽先游山再定約送客後即移舟繞大小兩東門至菱蕩堰綠浮水面萍藻交縈尚有鮮菱可採蠓牆瓦屋臨水成村即泊於樹陰之下前一木橋過橋即進北門甚荒涼門額曰鎮江興星台登岸至孫家祠堂邨人於此設茶寮小有花木泉石即於池畔淪茗坐談薄莫歸舟雨後泥滑僅行數十武氣即上升委頓欲吐非憂能傷人老境何遽至此

十八日晴清晨推枕視旭日滿窗胸中亦如宿霧之盡掃豁然

開朗盥沐未畢與夫已交關於岸未午即飽餐先以一函送王翰臣寓告泊所又致仲履一函即與星台坐筍輿入山海虞人謂之扒山虎以繩貫板以板橫肩與瀆上山輜用杠者不同先至維摩寺高出山半迤邐登山循桃源澗石華澗而上瀑布飛流泉鳴谷應下視大江輪煙一縷隱約可覩狼山三峯蒼翠亦在有無閒梵宇營繕似未久丹堊尚新應尊真十八尊者亦未加采繪禪室有樓上奉山主直隸河閒景州牧屈成霖號肖巖神位稍憩下山至破山興福寺山徑窈而曲如往而復山門外有兩磐陀過此皆碎石犖确碁布瓦列雨後澗泉交注灌輸其閒徧山皆如溝塹土人謂之破龍澗澗

盡有小橋度橋即至寺門門外兩唐幢對峙一金貞書一陸
宸書早有拓本略一摩挲幢下兩蓮花座上層刻蟠蛇蟠下層
刻狻猊石兩製作略同即此可知為一時刻山門題毘尼法
界額左右一聯曰山河天眼裏世界法身中下題松泉日暉
憶似畫禪寺僧也圓寂久矣先至大室小憩繼由四高僧祠
登救虎閣四僧負牆立象下承雲氣皆作五采一僧龐眉皓
首一僧面深赭一僧清癯如寒士一僧如火頭金剛申眉努
目瞻仰既畢即登樓窗外俯瞰白龍池池上老檜三株婆娑
有生意對面高峰樹木葱蔚灌莽陰森蒼秀奇古始知常少
尉曲徑通幽處禪房花木深一幽字一深字真傳神之筆陳

子準所藏書早知無一冊不再求津逮矣閣左為龍神殿大殿之右為君子泉一小小方塘耳浮藻濃鋪不見潭影泉上為廉飲堂視日影已加中即循廊出徧觀內外壁間石刻常少尉詩最古書者米南宮刻者言太守如泗已在乾隆中葉且未必真跡乾隆癸未重修記顧鎮文邵齊然書雖近刻此筋繁結逼肖李北海直可退贗米而已之其次則吳越忠懿國王造銅阿育王舍利塔記萬曆丁巳孟夏佛降生日懸山沙門德清書于毘陵道中之三里庵懸山為蒙叟本師亦名筆也又其次為崇禎壬申孟夏誰垢居士魏浣初高林庵記嚴炳書其餘萬曆三碑一為重建四高僧祠記章有成文呂